

Impak besar kesukarelawanan

Bersama

**Profesor Datuk
Dr Arifin Abdu**



alam menghadapi dunia yang semakin mencabar dengan pelbagai isu kemanusiaan, bencana alam dan hambatan sosial, peranan mahasiswa semakin ampuh untuk membina masyarakat yang prihatin dan bertanggungjawab.

Kerja-kerja kesukarelawanan melalui misi bantuan bencana bukan sekadar aktiviti luar bilik kuliah, tetapi untuk membentuk jati diri dan nilai insaniah yang amat berharga.

Kesukarelawan bukan hanya tentang memberi bantuan fizikal tetapi melibatkan empati, ihsan dan keprihatinan terhadap penderitaan mangsa.

Apabila mahasiswa terlibat dalam misi kemanusiaan, mereka belajar memupuk nilai murni dalam realiti kehidupan yang tidak diajar sepenuhnya dalam kuliah.

Penglibatan dalam kerja kesukarelawanan memberi ruang kepada mahasiswa untuk mempraktikkan kemahiran komunikasi, pengurusan masa, kepimpinan, penyelesaian masalah dan kerja berpasukan untuk menjadi manusia matang dalam keluarga dan masyarakat.

Pada minggu terakhir bulan Ramadan dan minggu pertama bulan Syawal lalu, Majlis Sukarelawan Universiti-Malaysia (Maskum) di bawah naungan Kementerian Pendidikan Tinggi (KPT) termasuk mahasiswa Universiti Putra Malaysia (UPM) terlibat dalam misi pasca bantuan kesukarelawanan di tiga lokasi tragedi dalam negara. Tragedi itu ialah kebakaran paip gas di Putra Heights, Subang Jaya, misi bantuan pasca banjir di Pulau Pangkor dan Tampoi, Johor bagi membantu komuniti yang terjejas akibat pelbagai bencana.

Menteri Pendidikan Tinggi, Datuk Seri Dr Zambry Abdul Kadir turut turun padang untuk bersama-sama mahasiswa Maskum dengan mengorbankan cuti Hari Raya Aidilfitri bagi membantu mangsa kebakaran di Putra Heights dan mangsa banjir di Pulau Pangkor.

KPT, Maskum, UPM dan sukarelawan Selangor di bawah kerajaan negeri Selangor berganding bahu menyediakan bantuan keperluan asas, sokongan psiko-sosial dan perubatan kepada mangsa.

Saya berkesempatan bersama 140 sukarelawan mahasiswa UPM ke Putra Heights yang merupakan sukarelawan terbesar universiti awam dalam misi tersebut.

Di Pulau Pangkor, Perak, saya menyertai 33 sukarelawan mahasiswa dan staf UPM untuk membantu Skuad Ihsan Madani KPT melalui Maskum dalam Misi Bantuan Pasca Banjir pada hari raya keenam dan ketujuh dengan memberi tumpuan kepada pembersihan rumah, membuang barangan rosak dan mencuci kawasan sekitar.

Sementara itu di Tampoi, Johor, lima hari sebelum Aidilfitri, Maskum termasuk 25 mahasiswa UPM turut membantu mangsa banjir dalam kerja pembersihan kawasan terjejas, pengagihan bantuan keperluan asas dan sokongan moral kepada mangsa terkesan.

Komitmen Maskum yang terdiri daripada 20 universiti awam Malaysia dan bernaung di bawah KPT berfungsi sebagai platform utama dalam menggerakkan misi bantuan bencana, menganjurkan program pembangunan komuniti, pendidikan, kesihatan dan kelestarian alam sekitar serta melatih kepimpinan sukarelawan mahasiswa.

Melalui pelbagai misi bantuan ini, Maskum terus memainkan peranan penting dalam membentuk mahasiswa yang cakna, prihatin dan sedia berbakat kepada masyarakat, selaras dengan matlamat KPT untuk melahirkan graduan yang holistik dan berdaya saing.

Apabila berganding bahu

dengan mahasiswa dalam misi ini, saya melihat mahasiswa mampu belajar menjadi rakyat yang prihatin, aktif dan bersedia membantu negara apabila dilanda musibah, selari dengan aspirasi Malaysia MADANI yang menekankan nilai kemanusiaan dan kesejahteraan bersama.

Saya berharap kerja kesukarelawanan Maskum ini dapat dikembangkan dengan lebih aktif dalam misi bantuan antarabangsa kerana platform ini mempertemukan pelajar dari pelbagai latar belakang serta membuka ruang kerjasama dan jaringan sosial yang luas.

Walaupun tanggungjawab membajai usaha ini terletak di bahu Timbalan Naib Canselor Hal Ehwal Pelajar universiti masing-masing, cabaran utama setiap universiti ialah bagaimana menjadikan aktiviti kesukarelawan mahasiswa dibuat atas dasar kesedaran mereka dan bukannya memenuhi syarat merit kokurikulum.

Cabaran ini boleh menjadikan pengalaman kesukarelawan mereka kurang memberi impak peribadi dan sosial.

Oleh kerana mahasiswa ialah pemimpin masa hadapan, pendedahan kepada kerja-kerja bantuan bencana sejak dari universiti akan menyemai rasa tanggungjawab menyumbang kepada masyarakat tanpa mengira keuntungan.

Kemahiran ini sangat diperlukan dalam dunia kerjaya selepas tamat pengajian kerana majikan mula mencari calon pekerja yang mempunyai pengalaman kesukarelawanan.

Dr Zambry menyatakan usaha

memperkuh ekosistem pendidikan tinggi negara ialah dengan memberi tumpuan kepada peningkatan kualiti pengajaran dan pembelajaran, pengantarabangsaan institusi pengajian tinggi dan pemerkasaan mahasiswa melalui aktiviti kesukarelawanan dan pembangunan sahsiah.

Beliau percaya penglibatan aktif mahasiswa dalam Maskum dapat melahirkan graduan yang bukan sahaja cemerlang akademik, tetapi juga mempunyai nilai kemanusiaan dan kepimpinan yang tinggi.

Menurut Ketua Pengarah Pendidikan Tinggi, Prof Dr Azlinda Azman, kesukarelawanan bukan sekadar aktiviti sampingan, tetapi sebagai elemen penting dalam pembangunan sosial dan pendidikan tinggi.

Naib Canselor UPM, Datuk Prof Dr Ahmad Farhan Mohd Sadullah, memperkenalkan konsep Jiwa Putra kepada mahasiswa UPM sebagai penjenamaan aktiviti kesukarelawanan mahasiswa atas nama universiti untuk berbakti kepada universiti dan masyarakat tanpa bergerak secara berasingan mengikut nama kolej asrama atau fakulti.

Membudayakan kerja kesukarelawan dan misi bantuan bencana mahasiswa bukanlah satu alternatif, tetapi satu kewajian untuk membentuk bangsa yang seimbang, berilmu dan berjiwa besar.

**Penulis Timbalan Naib
Canselor (Hal Ehwal Pelajar
dan Alumni) UPM**

Apabila mahasiswa terlibat dalam misi kemanusiaan, mereka belajar memupuk nilai murni dalam realiti kehidupan